



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**51. Kalenderwoche – ab 19. Dezember 2010**

## Windordaufe

Nee, beim allorbesdn Willn, dähr Windor dud mir schon jedzde irschendwie offn Geisd gehn! Anfang had das gleisch dadermid, dass isch misch beim erschn großn Schneeeinbruch lang gemachd hab. Isch loofe so nischds ahnend dursch dähn Schnee zur Koofhalle... ja, zum Subormargd, wie mir jedzde sachn!... koofe drinne ein, komme widdor raus und schdambfe widdor zurigg in Rischdung, wo isch wohn due. Von dor Koofhalle... äh, Subormargd... duds een kleen Hang nunnor gehn zum Fußwesch. Da is eene Drebbe. Beim Noffgehn is die Drebbe kee Broblehm gewähsn. Dor Schnee war ja noch nisch so sähr hoch, bloß so zähn Zendimedor villeischd. Abor beim Nunnorgehn... - da ziehds mir bledzlich de Beene weg! Isch schbiere rischdisch wie isch waachereschd in dor Lufd liesche. Die zwee Einkoofsbeudl ooch. Un während isch so in dor Lufd liesche, denke isch - in Bruchdeele von Segundn! - dass, wenn isch gleisch landn due, isch mir womeeschlich dähn Schdeiß breschn du. Isch denke dann noch, dass das e ziehmlichor Misd sein däde un dann erfolschd de Landung. Finfunneunzisch Kilos dun off dor Drebbe offschlachn. Dumbf! Dann noch de Einkoofsbeudl! Isch liesche rigglings off dähr Drebbe un lausche in misch nein, obs irschendwo gegnirschd had odor weh dun dud. Isch heere erschdma nischd. Weh dun duds mir am reschn Arm un irschendwo am Beggn. Dor Schdeiß scheid heil gebliehm zu sein. Isch drehe misch off de Seide un rabbl misch langsam nach ohm. Isch kanns kaum gloom - es gehd! Nischd gebrochn! Dor Arm lässt sich beweeschn, wenss ooch e bißl zwiggd dud. Nascha, dann habsch meine zwee Einkoofsbeudl offgesammlt... bloß eene Weinflasche hadde dähn Schdurz nisch ieborlähd... un bin heeme. Isch war eschd froh un gudor Laune. Dass isch noch so elasdich bin un misch ohne Knochnbrische off eene Drebbe hinschmeddorn kann, dass häddsch mir gahr nisch mähr zgedraud! Zur Erinnerung an meine Glanzleistung hads mir dann zwahr noch einische Daache e bißl im undoren Kreuzbereisch geziebd, abor sonsd... - isch hadde meine

Windorfeuordaufe glänzend ieborschdandn! Un seidhähr loof isch nu ooch sähr vorsischdisch. Bloß midm Audo binsch dann nochma off de Rudschbahn gekomm. An eenor Kreuzung war de Schdraße bledzlish un unerwarded schbieschgladd. De Bremsn ham nisch reagierd. Wenn meine Gudste nisch offgeschrien hädde - "bass off!" - isch hädde das gahr nisch gleisch midgegrischd. Abor dann habsch geisdesgeschnwärdisch nach links niebor gelenkd, wo kee Eis war... un ooch zum Gligg kee anres Audo! So is das Audo, das vor mir an dor Ambl gewarded had, vorschond gebliehm.

Un das is de zweede Feuordaufe gewähsn. Nu bin isch hoffendlish hinreichend off Windor eingeschedld. Doi, doi, doi! Un in Auswertung dor windorlischn Gesamtsiduadsjohn habsch noch e Gedischd gedischded:

Ach, endlich kenn mir rischdisch schbiern... - wenn dor Wind ganz eisisch klirrd, wenn mir uns dähn Arsch abfriern - dass das Glima wärmor wird!

**Eduard Sachsenmeyer**